

陶雲汀先生奏疏

奏摺卷三目錄

晉臬稿

安化陶

謝

補授山西按察使謝

恩摺子

恭報到山西按察使任兼署布政使摺子

附片一件

查覆御史梁中靖奏劾陽曲縣介休縣摺子

巡撫

督同會奏

審明京控採買摺子

附奏晉省辦差情形摺片

查訊續控部案究出訟棍摺子

覆奏京控鹽案摺子

巡撫督同會奏

調任福建按察使謝

恩摺子

補授安徽布政使謝

恩摺子

恭報到安徽布政使任摺子

補授山西按察使謝

恩摺子

奏爲恭謝

天恩籲請

陛見事竊

臣

接署督

臣

行知准吏部咨開本年十一

月初七日內閣奉

上諭山西按察使員缺著陶澍補授欽此伏念

臣南

楚菲材由嘉慶七年進士改庶吉士授職編修

典試四川分校會闈改江南道御史洊歷吏科

給事中巡視中城東城巡視淮安漕務上年閏

四月奉

旨補授四川川東兵備道到任以來甫經一載方冀驚  
駘自策稍酬

先皇簡畀之

恩豈期犬馬無能驟荷

聖主遷除之

寵聞

命之下感悚難名竊思晉省爲

畿近要區臬司乃刑名總匯懲奸剔蠹責重事繁

臣識淺才疎深懼弗克勝任惟有顙懇

聖恩准臣入京瞻仰

天顏親承

訓示敬謹遵循庶免隕越除將川東道印遵照署督

臣檄行移交重慶府知府花杰接護外謹專摺  
恭謝

天恩臣卽日起程由川陝陸路迎摺赴

闕跪聆

訓示伏祈

皇上聖鑒謹

奏

嘉慶二十五年十二月初八日自重慶拜發

道光元年二月初三日平遙途次接奉

硃批准來見欽此

恭報到山西按察使任兼署布政使摺子

奏爲恭報

微臣

到任日期並兼署藩司緣由仰祈

聖鑒事竊

臣

於二月中旬瞻覲

天顏疊蒙三次

召見跪聆

聖訓剴切周詳倍增感悚旋奉

諭速赴新任於三月初一日馳抵山西准署臬司冀

寧道百貴將

勅印文卷委員齎送前來當卽恭設香案望

闕叩頭謝



恩祇領任事隨奉撫

臣

成格札知藩司邱樹棠調任

江西應行赴任新授藩司葉世倬到晉尙需時

日飭

臣

兼署布政使印務於初七日接篆署理

伏念

臣

一介庸愚上年冬月首被

寵命擢授臬司特達之

恩非

臣

夢想所敢期抑豈捐糜所能報迺荷

鴻慈獎勵

訓勉有加

臣

雖駑鈍敢不凜遵

聖誨加倍出力矢公矢慎以陳臬事至藩司爲通省

官員表率於吏治尤關緊要

臣

斷不敢因暫時

署理稍涉因循惟有隨同撫臣督飭所屬激發  
天良努力趨公以冀稍答我

皇上教誨成全之至意所有微臣感激下忱並到任

日期暨兼署藩司緣由理合繕摺恭謝

天恩伏乞

皇上聖鑒謹

奏

道光元年三月初七日拜發十五日山西省城  
奉到

硃批汝歷任伊始諸事均宜留心查看毋忘面訓之

言勉之慎之欽此

夾片一件

再前蒙

欽交案件三起除平遙縣民間尙珏臨汾縣民王本  
志尙未解到外其御史梁中靖叅奏陽曲知縣  
武告成介休知縣陸元鍾一摺現同撫臣密查  
確訪俟得有實據卽行核辦覆奏謹附片以

聞

同日奉

硃批秉公審辦欽此

查覆御史梁中靖奏劾陽曲縣介休縣摺子

巡撫督審會奏

奏爲遵

旨確查定擬恭摺覆

奏仰祈

聖鑒事竊

臣

等接准軍機大臣字寄二月二十二日

奉

上諭據御史梁中靖奏陽曲縣知縣武告成前經丁憂希圖坐補原缺先具呈告病開缺俟上司批准始報丁憂現卽坐補陽曲縣又介休縣陸元鏞前

因河東鹽務有舉報新商之信預傳富戶聲言送往充商行賄求免者自數百金至數千金不等該縣得賄至七八萬之多等語官員匿喪贖貨均屬大干法紀著巡撫成格按察使陶澍秉公確查如武告成陸元鏞實有前項情弊務卽據實嚴叅按律定擬具奏毋得稍有徇隱該御史摺著發給閱看將此諭令知之欽此

臣

成格以該御史所奏關

係人紀官常不可不嚴加切究遵卽率同

臣陶

澍連日查辦據御史原摺內稱現任陽曲縣武告成於嘉慶二十二年四月間在任丁憂因念

服闋後歸入補班銓選無期不若先爲告病將來可補原缺且陽曲爲晉省首邑坐補後易於陞遷竟匿喪不報先具呈告病開缺壓擱十數日俟上司批准始報明丁憂等語臣等查當日各上司或因陞遷或因事故晉省現俱無從查詢惟檢閱案卷武告成前於嘉慶二十一年四月十二日通詳告病經陞任藩司姚祖同以連日傳見該令面色雖覺憔悴公事應對並無舛錯何至遽請告病批駁旋經陞任太原府葉汝芝據情轉稟委員驗報藩臬兩司於五月初三

日會詳前撫臣衡齡於初五日具

題開缺至十七日據署陽曲縣邱鳴泰詳報武令  
於十四日丁母憂均經咨

題有案其告病年分係二十一年與該御史所奏  
二十二年不符自係記憶未真臣等連日密訪  
並將該令撤任委當日接署陽曲之現任忻州  
知州邱鳴泰嚴查辦理隨據傳到武令家人李  
升供稱伊家主於嘉慶二十一年四月初間感  
患怔忡延本城馮醫生診視是月十二日詳請  
解任伊老主母呂氏夙患痰喘見家主告病五

月初間痰喘轉甚因俗語有衝煞之說預將棺木擡至內署直入大堂伊老主母垂絕復甦者數次延至十四日病故是伊具報等語復傳醫生馮釗陰陽生周興德供亦相符並傳武告成面詢該員涕泗橫流據稱伊母年已八十迎養署中五月初伊已告病伊母舊喘復發垂危數次號泣莫救至十四日丁憂並稱伊於十九年計典卓異服闋赴部例應卽選並非選缺無期之人何肯希圖坐補匿喪不報詰以有無預擡棺木入署據稱因悞聽俗說謂可衝煞實屬一時



冒昧等語查該令母故距伊告病日期相隔一月有餘夏月天氣熱蒸斷難久擱因其預擡棺木入署致啓人言其非匿喪捏病似屬可信至該御史摺內所稱介休縣知縣陸元鏞捐納出身聲名狼藉前撫衡齡在任時河東鹽務有舉報新商之信其實未有明文該縣乘機差傳閭邑富戶數十家聲言送往河東充商晉省富民視鹽商爲畏途皆夤緣行賄求免自數百金至數千金不等該縣得賄至七八萬金之多等語查該御史所稱富戶數十家並無姓名居址無

憑查訊况事隔數年卽當日富戶已多非其舊  
若紛紛傳訊轉形驚擾因思摺內既有差傳一  
語如果屬實當有差票及衙役可查當將該令  
撤任飭令接署知縣廉九經前往訪查並檢查  
舊卷解省茲據稟稱遵查復商章程向係舊商  
消乏舉報新商更替由河東道行文指名提充  
縣中並無招商之事陸令任內曾有靈石縣商  
人梁八愷舉報介休縣富民侯生鍊接充引地  
一案因侯生鍊年老子幼延宕年餘始經解送  
此外亦無徇庇免送之商又嘉慶二十年十月

內前任藩司吳邦慶轉奉巡撫衡齡批飭招選  
殷實備商旋經出示停止卷內亦無陸令出票  
傳人稿據嚴訊該令門丁胡三曹升及各班書  
差併傳殷實之戶李向南等均稱二十年冬季  
並無票傳充商挾索情事臣等復細加密訪委  
無受賄確據查陽曲縣知縣武告成患病在先  
丁憂在後案卷俱存並無捏病匿喪實蹟其坐  
補原缺係屬照例之事惟該令身為職官當親  
病危急不思盡心湯藥惑於流俗擡棺衝煞竟  
昧豫凶非禮之戒殊屬紕繆妄為應請照不應

重律杖八十係私罪降三級調用毋庸查級抵銷介休縣知縣陸元鎮招商納賄事無實據惟該令由捐納出身年近六旬漸形衰憊於地方公事未能振作應請勒令休致以免貽悞是否有當謹將遵

旨確查緣由繕摺覆

奏並將該御史原摺附繳伏祈

皇上聖鑒訓示謹

奏

道光元年三月二十八日拜發初八日接奉

硃批另有旨欽此同日奉

旨山西陽曲縣知縣武告成著降三級調用介休縣知縣陸元鏞著勒令休致欽此

審明京控採買摺子

奏爲遵

旨審明定擬仰祈

聖鑒事竊照山西平遙縣民間尙珏赴京呈控該縣勒派採買支應差務一案於道光元年三月初十日接都察院劄付二月二十日內閣抄出奉旨此案著交陶澍提集人証卷宗秉公審訊定擬具奏原告閭尙珏該部照例解往備質欽此又接撫臣成格行知三月二十四日奉

上諭成格奏發審控案請交臬司併案審辦一摺山

西平遙縣民人師萬玉呈控該縣採買勒折一案  
與閭尙珏控案同係一事著卽交陶澍併案審訊  
秉公定擬具奏欽此經兵部先後將師萬玉閭尙  
珏解送前來臣遵卽提齊人証卷宗查得前任  
平遙縣知縣沈照於嘉慶十九二十二三等  
年買補倉穀三次現任知縣楊霖川買補倉穀  
二次平糶一次均經

奏咨有案隨督同太原府知府岳良等在臣署內

隔別虛衷研訊緣閭尙珏籍隸平遙曾充該縣  
刑書因事革退嗣於縣民李大成與陰王氏通

姦致王氏服毒身死案內得贓問徒嘉慶十九年援

赦釋回上年十月內見該縣奉文採買起意控告斂錢使用因事關閭邑難以一人聳准商同伊親楊肇夏哄誘民人師萬玉田盛鄧全德霍冲霄郭守幅等代斂銀錢以作訟費編砌沈楊二令節次採買勒折浮收致鄉民賠累等詞在前藩司暨巡撫衙門具控批查集訊閭尙珏楊肇夏情虛畏審潛逃赴京以採買一事慫恿師萬玉先赴步軍統領衙門呈告閭尙珏又自行出名控



告併添砌車馬雞鴨等款在都察院遞呈

臣查

閔原呈內所控沈楊二令任內八年派買七次  
每次賠銀一二萬兩二十五年四月開倉糶穀  
七千餘石每斗糶錢一百八十五文十月採買  
穀八千九百三十石每石發銀一兩二錢零門  
丁書差層層剋扣交倉時搨穀尖量每石折錢  
三千一二百文歷控撫司衙門不爲究辦並差  
役趙輯瑞等因縣民常明文口出怨言稟縣責  
押等情一款訊據師萬玉供稱平遙縣採買倉  
穀因城關附近邨莊集場糧粟無多向係四鄉

鄉頭戶長甲催照依市價向有穀之家買運交倉書役並不經手穀戶貼賠運腳鄉頭等領銀交穀貼賠往返盤費相沿已久伊充東南鄉頭該前縣沈令任內六年採買三次伊領買穀九十石至一百餘石不等合穀戶共賠過運腳盤費等錢二十千有零又楊令任內二十四年採買穀三千九百四十餘石交倉及半糧價漸長隨卽停止伊只領買穀七十五石合穀戶共賠過運腳盤費等錢六千五百文二十五年四月內青黃不接糧價昂貴楊令因倉內尙有陳穀

恐致徵變減價平糶民間買穀向用市斗每石  
比倉石大二斗八升維時每倉石糶錢一千四  
百四十三文合市斗每石糶錢一千八百五十  
文合時估銀數每倉石糶銀一兩三錢秋收後  
楊令奉文買補并二十四年停買缺穀及兵借  
穀共八千九百二十九石零照依市價每倉石  
發銀一兩二錢七分各鄉頭戶甲赴縣當堂領  
銀有在縣前賣餽飽與閭尙珏素識之常明文  
帶醉往看經差役攔阻常明文吵鬧不依被楊  
令查知掌責示懲酒醒後釋放閭尙珏楊肇夏

遂尋向伊說買補倉穀不應令鄉頭們承辦若  
大家多湊盤費伊卽上控可永免採買伊因採  
買貼賠雖屬無幾若能永免自然更好隨送錢  
十千文鄉頭鄧全德也湊送銀五兩田盛湊送  
銀五兩錢七千文霍沖霄湊送銀十四兩郭守  
幅不知湊送多少問尙珏言已將伊等名字寫  
入呈內原只想圖准不料俱批府嚴查問尙珏  
因屢犯有案恐被府縣查出不敢投審只令楊  
肇夏赴府投到住了兩日就一同上京旋聞該  
縣要傳人証解府審訊伊不知呈內情節又見

閆尙珪等逃走心無主意只得趕赴京中要想  
喚回閆尙珪等了結閆尙珪又欲拉扯車馬號  
草等事聯名告狀伊未應允閆尙珪稱已湊得  
銀錢若不遞呈無顏回去令伊只告採買一事  
代爲寫呈伊因從前並無賠銀一二萬兩及每  
石折錢三千一二百文之事令其改換閆尙珪  
言無謊不能成詞伊一時糊塗就赴提督衙門  
遞呈將伊解送前來閆尙珪隨後又遞呈詞伊  
不知情至閆尙珪呈內所稱劉杰武廷弼赴京  
講和之說劉杰係伊親戚伊家恐其聽信閆尙

珏唆使獲罪令劉杰往喚伊回因武廷弼有買賣在京附件同行亦曾向伊勸過實非楊令指使前往可與閆尙珏對質等語訊之田盛鄧全德郭守幅供各相符臣以師萬玉呈內所控八年七次採買及每次賠銀一二萬兩上年十月派令三十八里採買每里十甲各發銀二十四五兩買穀二十三石零開載數目歷歷如繪如果閆尙珏任意混砌師萬玉焉肯投遞當向駁詰據稱伊先不知閆尙珏希圖斂錢因曾向告知充過刑書熟悉官事只須採買賠過錢文別

項情節儘可捏飾於今方知被其愚弄實在後悔等語又查閭閻珥珥呈控該縣設立公和局派四鄉車馬當差每年賠銀五六千兩沈楊二令分文不發一款訊據工書侯成山并在局辦事之監生馬加猷等供稱平邑衝途常有要差及解送餉鞘人犯過境遇差繁時號馬不敷不得不借資民力向來每車一輛按日發錢二百文馬一匹發錢一百文差役臨時拉雇弊竇叢生乾隆三十四年該前縣蔡令任內四鄉請定章程按月輪值受雇幫差毋許衙役混拉詳准各

衙門並立有碑記設局支應官民兩便所有雇價鄉民因爲數無多數十年來從未領過沈楊二令任內照舊辦理閭閻珥並不在局辦事又不應差本不知情實屬牽控等語又控該縣號內派折鞍屨錢六千文一款訊據馬加猷及號頭史邦俊等供稱向來號內備有鞍屨十副閒因差使不敷向公和局借用差過交還因係四鄉輪值偶預備未及卽租賃支差每租鞍屨一副不過一百餘文係出賃鞍屨之人得受號頭人等無從折錢等語又據控辦差雞鴨未發價



值有票可憑一款訊據馬加猷等及禮書李士公等供稱過往官員向無酒席惟喇嘛伯克回目等差到境偶需雞鴨辦差人等搜尋派買每多影射滋擾嘉慶十六年該前縣喬令任內百姓呈請應用雞鴨由縣出票在公和局支應按季赴縣領錢差役不得經手有案可查公和局內已將上季錢文在縣領訖尙珏並不在局係屬牽砌妄控等語又據控該縣號馬喂草每千斤只發錢六百文每年百姓賠銀二三千兩一款訊之兵書董嗣增及馬加猷等供稱號內

每月用草三萬觔每觔照例發價銀一釐每月  
共發銀三十兩按季由公和局具領惟向議章  
程每月派定四人常川照應月需口食銀十二  
兩卽在領出草價內扣除以免攤派現有領狀  
可憑並非縣中短發閭尙珏局外之人不知領  
出草價局裏扣除工食實屬悞控等語以上各  
款均經督率委員反覆究詰矢口不移提質閭  
尙珏無可置辨惟自認年老糊塗一時混寫後  
悔莫及臣查閭尙珏師萬玉所控各情均關民  
累必應澈究內中每石折錢三千一二百文致

百姓賠累一二萬兩一款尤爲重大雖現據認  
誣但伊等並非穀戶本因斂錢而起或因畏罪  
而服所供尙難憑信因思該縣果有折收情弊  
則存倉穀石必有虧短一經盤查不難水落石  
出且四鄉戶甲皆係切膚之人必不肯代爲諱  
飾惟本官若仍在任恐有瞻徇掩飾隨將楊令  
撤回省垣先委霍州知州劉斯裕前往該縣逐  
款密查並摘傳戶甲人等查訊據供上年十一  
月初三日楊知縣甫經開倉閭尙珏等卽已赴  
省於初八日具控尙未收穀焉有浮收勒折之

事其餘各款均與在省原被人等所供相符取具切結並赴該縣常平倉逐款盤量實貯穀石統計動支缺穀及發價採買未交穀數核與原貯數目符合案無遁飾並據紳士梁碩敏等呈稱楊令居官勤明鋤奸愛士又老民范有義等數十人僉稱良宰被控萬民難甘投具公呈前來察看情詞均屬真摯查例載驀越赴京告重事不實者發邊遠充軍等語此案問尙珏以革吏犯案擬徒遇

赦釋回因該縣奉文買補倉穀藉端控告冀圖斂錢牽

砌勒派折收及科索車馬等項重情慫恿師萬  
玉先後赴京分起具控殊屬刁健未便因所控  
尙屬有因稍從寬縱閭尙珏除斂錢輕罪不議  
外合依驀越赴京告重事不實者發邊遠充軍  
例發邊遠充軍斂得銀錢照追入官冊報師萬  
玉聽從閭尙珏教唆混控亦有不合但伊承充  
鄉頭每次採買原有貼賠盤費與無故妄控者  
有閒惟代斂訟費送給應與代斂銀錢之田盛  
鄧全德郭守幅均請照不應重律杖八十該犯  
等事犯到官在本年四月初七日欽奉

恩詔以前間尙珏所得軍罪請減爲杖一百徒三年  
年逾七十照例收贖師萬玉田盛鄧全德郭守  
幅各得杖罪請予援免該縣地當孔道里民支  
應車馬等項曾於乾隆三十四年立有碑記相  
安已久應聽仍照舊章辦理其雞鴨一項雖係  
舊章事涉瑣細易於影射應令該縣自行買備  
毋許再由公和局支應該縣前任知縣沈照及  
現任知縣楊霖川採買填倉穀石次數糧數暨  
平糶價值均與歷年

奏咨案據相符並非私行糶買亦無多糶勒折浮

收情弊應毋庸議該縣不通水路城關市集穀粟無多不得不向四鄉有穀之家買運交倉惟運腳等項相沿雖久應令該縣捐廉給發以示體卹該縣上年採買穀八千九百二十九石零除已交七百餘石外未交之穀現值青黃不接糧價較昂已飭令停止俟秋收後察看年歲豐歉再行酌量辦理常明文酒醉吵鬧業經該縣掌責示懲請免重科丁役韓三薛光壽等並無明和暗拏等事監生武廷弼亦非該縣指使進京均毋庸議應與無干之馬加猷等卽爲省釋

楊肇夏霍冲霄緝獲另結未到人証並免行提  
以省拖累除將全案供招呈送刑部外理合將  
遵

旨審明定擬緣由恭摺覆

奏是否有當伏祈

皇上聖鑒訓示謹

奏

道光元年五月二十九日拜發六月十五日奉  
到

硃批刑部議奏欽此



附奏晉省辦差情形摺片

再查晉省爲五省通衢西通新疆暨西藏等處  
差務絡繹物價倍於他省向來差務一項借資  
民力各出分釐衆擎易舉相安已久沿途各州  
縣皆然蓋緣北地不通舟楫力役之征勢所難  
免而晉省山區尤甚若車馬等項不出於里民  
遇有緊急差事必至紛紛截拉大爲行旅之害  
且州縣俸廉有數力不能支勢必別假事端巧  
取於民是官之累旣增而民反益其害也無如  
一縣之中良莠不齊一二刁民動輒以地方公

事與民無涉爲辭挾制官長於中取利訐告之  
風從此而起 臣仰蒙

皇上逾格

鴻慈擢畀重任蒞事伊始整頓爲先不特無所用其  
迴護且來自田間亦斷不敢稍忘民瘼如有不  
肖州縣於常例之外增設陋規朘削民膏婪贓  
入已訪查確實必當嚴叅究辦決不姑容若係  
沿習章程藉力辦公於官民兩無所損均當各  
循其舊庶不致除一弊而轉添一弊以期吏治  
民風咸歸整飭 臣爲通省大局起見理合附片

奏明伏乞

皇上聖鑒

道光元年五月二十九日拜發六月十五日奉  
到

硃批所見甚是勉力行之欽此

查訊續控部案究出訟棍摺子

奏爲遵

旨查訊續控情形究出訟棍憑空捏誣誘陷愚民請  
敕嚴拏解審以戢刁風而除民害事竊照平遙縣民  
楊萬山赴京續控勒結撕毀等情一案道光元  
年六月十四日接都察院劄付五月二十五日  
內閣抄出奉

旨此案前交陶澍審辦尙未審結楊萬山著解往山  
西歸案質訊欽此

臣

查本年二三月內兩次奉

旨交審平遙縣民間尙珏師萬玉呈控該縣採買及

差務一案經 臣 陸續提集人証委員盤查親督  
研訊於五月二十六日據閩尙珏等具結完案  
業於二十九日恭摺覆

奏奉

硃批刑部議奏欽此欽遵在案茲復經兵部將楊萬  
山一起解送前來 臣 遵復提集人証督同委員  
虛衷研訊除師萬玉等供與前次相同不敘外  
訊據閩尙珏供稱平遙縣採買差務章程俱相  
沿已久前蒙訊明分別辦理如車馬應存雞鴨  
應革鞍屨號內預備採買穀石俟秋後酌辦當

堂吩咐甚明衆目共覩焉有頂嘴及將結扯碎之事至前年採買止買穀四千石去年止收穀七百餘石伊前此架辭妄控亦止言二萬餘兩豈肯自相矛盾忽具科派六萬兩之結况伊於五月二十六日過堂方始具結不知楊萬山何時京控就預先捏造撕結的話伊素不相識實不知情訊據楊永祥供稱賣菜爲生家無一畝從未認識閭尙珏先不知伊子楊萬山京控六月初七日撞遇楊肇夏之子楊九命說伊子也能京控以後可不必挑菜不愁沒錢用邀伊至

公所上座奉酒時有閭允中亦在旁招呼始知伊子赴京混告等語提出楊萬山質對始猶狡飾自稱糧戶迨楊永祥一見卽行哭罵楊萬山始吐真情供稱伊向在母舅李家喂豬春間受雇在省做飯四月二十四日閭永中說伊叔父閭尙珏斂錢捏控怕審虛問罪不能歇手楊肇夏現匿京師是伊叔父兒女親家他訟筆極巧又是本案原告若送信去楊肇夏自會設法當給伊路費銀三兩錢七百文又向師萬玉開寫住處說楊肇夏潛匿甚密有時在西湖村增福

館有時在肉市內天全館忽東忽西並無一定  
惟有西直門外接近饅頭村之樹邨地方有平  
遙人袁姓麵舖係楊肇夏常匿之所一問便知  
伊卽於二十五日起身赴京五月初四日到樹  
邨袁姓舖內楊肇夏外出初六日始回見面初  
八日楊肇夏做就呈詞念與伊聽令其控告伊  
荅言詞內俱是假話伊係事外傭工之人如何  
敢告楊肇夏說無謊不成詞令伊捏稱父親楊  
永祥與閭尙珏同學地方公事人人可告若遞  
呈時審問就捏說是糧戶將附近地畝混指又



慮伊記憶不真教供數日始帶至順城門外店內歇宿十六日帶伊至都察院門首遞呈楊肇夏旋即避開二十六日起解楊肇夏早在城門外等候乘空給伊盤費錢一千文說還要糾人續控他總在暗中主擺管教案不能結問尙珏罪名就可拖散又囑咐緊記所教供詞切莫說出他真住處所於今方知被其愚弄他原告不到案卻教伊案外人頂替惟求免罪等語行提楊九命業經逃逸隨將閆允中獲案據稱目擊楊萬山進京屬實其書信銀兩係楊九命所給

伊不知情自因楊九命在逃是以狡展臣查楊肇夏係平遙縣生員前經學政陳官俊訪聞該生劣蹟咨革此案自上年十一月初三日該縣開倉交收採買穀石初八日該革生與革吏閆尙珏卽誘同民人師萬玉霍冲霄鄧全德田盛以浮收勒折賠銀二萬在撫藩衙門具控其時收穀止七百餘石尙不及應交穀石十分之一卽使果如所控自應審訊方明乃甫經批府嚴查而師萬玉已赴步軍統領衙門具控甫經奉旨交審而閆尙珏又赴都察院衙門具控並未候審

何由知其眞僞迨臣集訊兩月有餘楊肇夏始終匿不赴案且溯查原案本係六人聯名及京控時又分爲數起皆係楊肇夏主使現又誣使案外之楊萬山具控以全無影響之詞編砌如繪京控視同兒戲誣捏不啻含沙藐玩

國法忌憚毫無致使愚民無知犯罪彼反置身事外潛匿無踪若不獲案究懲不特案情反覆拖累徒滋抑且刁風日長大爲民害除飭太原汾州各屬踪緝楊九命等務獲外相應請

旨飭下步軍統領順天府五城一體嚴拏楊肇夏解

晉以憑按例懲辦用戢訟源而靖地方爲此具  
奏伏祈

皇上聖鑒謹

奏

道光元年六月三十日拜發七月十三日臬署  
接奉

硃批另有旨欽此同日奉

旨山西革生楊肇夏著步軍統領順天府五城一體  
嚴拏務獲解往山西歸案審辦欽此七月十七日  
邸抄到晉奉

旨楊肇夏著卽解往山西交成格督同藩司葉世倬  
提集原案人証秉公嚴審定擬具奏此案獲犯迅  
速番子頭目王鑑著賞戴藍翎李煥著賞給九品  
頂戴欽此

覆奏京控鹽案摺子

巡撫督同會奏

奏爲遵

旨審明定擬恭摺覆

奏仰祈

聖鑒事竊河東鹽商范立德遣家人張升赴京呈控  
總商王恒泰將應交歸公銀兩攤派衆商及河  
東道張大鏞做壽索要元寶等情經步軍統領  
衙門訊供具

奏奉

旨此案著交成格督同臬司陶澍提集人証秉公嚴

審定擬具奏務得確情不得稍有徇縱抱告張升  
該部照例解往備質欽此將張升咨解前來遵卽  
行提人卷並調該道張大鏞來省旋據王恒泰  
夥商楊應階尉世隆夥商傅世勲呈稱王恒泰  
等向在兩淮承辦鹽務其河東引地係伊等夥  
商代辦茲來省候質等情臣成格督同臣陶澍  
核卷提集人証逐細研鞫緣范立德籍隸平遙  
縣捐納布政司經歷職銜承充河東鹽商辦理  
河南省宜陽新安並代辦孟津及山西虞鄉四  
縣引地伊族中范天德商名夥辦河南盧氏及

山西解州引地因伊曾祖范天錫曾於乾隆初年辦過河南唐縣引地嗣以家道消乏退交郭世濟承辦嘉慶十二年復商之時因唐縣與湖北接壤地方緊要經前撫

臣

奏派王恒泰尉世隆辦理近因河南三十二廳州縣引地改爲商運民銷不致賠累范立德思佔唐縣引地先於本年正月間具控經

臣

成格批

經藩司河東道會核議駁在案詎范立德圖佔未遂復捏情遣家人張升抱呈赴步軍統領衙門具控如所控唐縣歸公銀兩係隨引餘利旣



經攤派衆商應將鹽引隨公項攤出若將唐縣引地賞伊一人承辦情願將歸公銀一萬六千餘兩獨力封繳一款卷查唐縣引地歸公餘利起於雍正年間原因引鹽運至唐縣可獲餘利今商運民銷鹽運會興鎮同衆商鹽觔一律定價發販並無餘利是以議將此項應解河南藩庫歸公餘利並裕州澠池二處應解歸公共銀一萬七千八百七十八兩零一併在於鹽觔成本內加入每鹽一觔賣銀一分七釐歸公銀兩卽在其內並非格外攤派曾經咨部覆准質之

范立德供稱伊因未經見過章程心疑攤派不公今已明白係屬妄控又所控廳攤銀兩按鹽引一名攤銀七兩有零核計每年攤收伊銀一千四百餘兩王恒泰並不令伊閱看賬目及唐縣引地因何不出廳攤一款訊據王恒泰夥商楊應階尉世隆夥商傅世勲並衆商陳疑太等供稱自有河東鹽務以來卽有此廳攤名目各省鹽務皆然歷係隨時按引攤派總商經理上年因各商拖欠不交總商畏於賠累公議於領引之時先將每年應攤銀兩按數交出存於公

所支用年終彙算總賬如撥解河工部餉委員盤費鞘木鐵箍領繳引張解京飯食盤費巡緝工食公局心紅紙張等項不下數十餘款每年約需銀肆萬餘兩現有用過底賬可查至唐縣引地向來因有歸公餘利是以不出廳攤公費亦已隨衆攤出惟求查賬質審隨將該商等呈出賬簿令與范立德當堂核算據范立德供稱所開用項悉與歷年款目相同並無弊端唐縣引地亦已隨衆公攤伊再無他說至其京控呈內稱該道於伊所控王恒泰等攤收廳費有無

弊端並未詳咨一語檢閱范立德先在臣成格衙門具控原詞並未告及所攤將原詞飭交閱看范立德無辭可辨又據控運城距茅津渡口雖僅百里山路崎嶇並無行鹽車路伊稟請用駱駝運至會興鎮批駁不准獨准王恒泰用駝直發鄧州一事兩歧一款訊據王恒泰夥商楊應階散商溫和公司供河南引地改爲商運民銷章程內因衆商引目多寡不齊恐爭先過河運至會興鎮發賣易啟爭端議明鹽觔均運至茅津渡店內由該處縣丞按引張多寡分配輪

流過河至會興鎮發賣以免攙越范立德稟請  
用駱駝徑運過河至會興鎮冀圖爭先是以張  
本道批駁至商人等同辦鄧州引地爲三十二  
州縣最遠之區車路難通民販不前是以遵照  
續議條款稟請暫充民販在運城駝鹽徑赴鄧  
州接濟民食與近在會興鎮發賣者不同俟民  
販增多卽行停止有案可查實非一事兩歧質  
之范立德自認不知詳細任意砌控又據控上  
年十一月十一日該道張大鏞之妻生日結綵  
稱觴該商穿皂衣呈送菲禮頗招無趣各商身

穿吉服呈送壽禮本年三月該道生日吩咐菲禮之外要送元寶二錠該商如數呈送一款訊據楊應階傅世勲陳凝太等供稱嘉慶十二年復商後河東道移駐運城兼辦運司綜理三省鹽務費用浩繁向來均有捐幫辦公銀兩交柬房呈送道署收貯隨時支用上年六月內張本道到任後商人等按照舊規呈送槩不收受上年七月內張本道之母生日曾吩咐不做壽也不許送禮屆期商人等前往叩祝並未進見迨至十一月十一日張本道之妻生日商人等至

頭門外卽被東房攔住說本道吩咐

國制甫滿百日不許進去焉有結綵稱觴之事彼時范立德因伊夥計失去課銀正在河南宜陽縣結訟未在運城何由穿皂服拜壽並見商人等吉服送禮實係無中生有任意誣捏就是今年三月張本道生日商人等因前兩次不准進見就不復往叩祇用手本在號房掛號其時范立德亦未回運城況張本道並未收禮焉有於水禮之外要送元寶之事惟張本道自到任以來一切緝私懸賞皆係出自捐廉每年僅有養

廉四千兩實不敷用本年二月間衆商再三懇求請將捐幫辦公一項照舊賞收張本道念係以公辦公聽其自便不必勉強商人等當向衆商傳知不知范立德何時送過辦公銀一百兩今捏作壽禮呈控實係影射願與質對等語臣等以該商楊應階等雖堅供該道並未做壽收禮恐其或有隱飾因思范立德原呈內載有店役管文職經手送禮之語管文職係范立德店役如果送禮併到門拜壽屬實必不肯代爲諱飾當提管文職詰訊據供上年十一月內范立



德因伊夥計丟失課銀在河南宜陽縣構訟未回本年三月內范立德在會興鎮亦不在運城是月不記日期店內管事人曾叫伊送道署辦公銀一百兩係東房接收實非壽禮並據該東房書吏侯庭瑞供認收過范立德捐送本道辦公銀一百兩是實質之范立德先猶狡展迨提督文職質對始俯首無詞供認上年十一月及本年三月張本道及妻兩次生日伊均未在運城亦未聞有結綵稱觴之事至督文職所送道署元寶二錠計重一百兩實因總商向伊店內

管事人告知捐幫本道辦公銀兩照舊呈送是以令胥文職送去伊圖辦唐縣引地經張本道議駁心懷不甘思欲京控因爭引地細事恐難邀准故架捏張本道之妻生日結綵稱觴並將所送辦公銀兩捏爲張本道於水禮之外復向需索始行呈送希冀聳聽又據稱該商應封課銀較別商歷年封納在先一節查范立德應交嘉慶二十三、四等年鹽課逾限至二、三月及半年不等惟應交二十五年併本年六、七兩月課銀未經逾限是該商於應交課項屢有遲延

並非歷年封納在先范立德自認希圖承辦唐縣引地信筆填砌以上各情節均經臣等反覆究詰各供如一並向該道張大鏞面詢供亦相同案無遁飾查此案范立德因圖佔唐縣引地遂赴京呈控如所告攤派唐縣歸公餘利等款訊由懷疑所致卽其將捐送道署辦公銀兩控作壽禮亦尙屬有因惟控該道於

國服甫滿百日後爲妻作壽結綵稱觴如果屬實該道應照違

制律革職治罪今審係虛誣應按律反坐范立德應

請革去職銜並革除商名依誣人杖罪加所誣  
罪三等律於違

制杖一百罪上加三等杖八十徒二年係鹽商挾私  
誣告本管鹽道應照胥役誣告本官例再加一  
等擬杖九十徒二年半至配折責安置河東道  
張大鏞訊無做壽收禮其所收范立德捐幫銀  
兩係統綱鹽商公捐緝私等項辦公之用向有  
成規並非勒派亦非始自該道任內尙無不合  
請免置議王恒泰尉世隆訊無攤派不公及違  
背章程情事應與聽從伊主指使赴京抱控之

家人張升均毋庸議范立德退出引地另行招商接辦唐縣歸公銀兩暨各商運鹽渡河發賣悉循舊章辦理王恒泰等駝運鄧州引鹽原因商販不前暫請充作民販應飭河東道隨時查察一俟民販增多卽行停止除全案供招咨部外謹將審明定擬緣由恭摺具

奏伏乞

皇上聖鑒訓示謹

奏

道光元年八月初五日拜發十六日奉到

殊批刑部議奏欽此

調任福建按察使謝

恩摺子

奏爲恭謝

天恩籲請

陛見事竊

臣

接巡撫行知准吏部咨開道光元年八

月二十七日內閣奉

上諭陝西布政使員缺著唐仲冕補授福建按察使  
員缺著陶澍調補所遺山西按察使員缺著程贊  
清調補等因欽此

臣聞

命之下感悚交增伏念

臣

湖湘下士識淺才疎上年

冬月初間由川東兵備道首破

寵命擢授山西臬司於本年三月到任兼署藩篆半載以來勉竭駑駘毫無報稱遽荷

鴻慈調補俾按全閩地當海濱允涵

聖澤之汪洋天遠長安彌仰

宸階而眷戀查閩屬刑名甲於各省釐奸戢暴整刷尤難當茲繁劇之區倍切冰淵之凜惟有籲懇

恩施准

臣入

見庶幾親承

誨示獲有遵循再

臣

自接印後迭奉



欽交案件俱已隨同撫臣次第查訊

奏結現在惟有王本志陳泰等二起人証已齊數  
日內即可全行審結趕緊交代星馳赴

闕請

訓謹先繕摺恭謝

天恩伏祈

皇上聖鑒謹

奏

道光元年九月初七日拜發二十日山西省城

接奉

硃批准來見欽此

補授安徽布政使謝

恩摺子

奏爲恭謝

天恩事本月初二日內閣奉

上諭安徽布政使員缺著陶澍補授欽此竊

臣

湘楚

庸材毫無知識由道員

特擢晉臬涓埃未効卽蒙

簡調閩省繁劇之任當卽專摺奏請

陛見奉到

硃批准來見欽此遵卽交卸起程茲甫於到京之日

卽奉

恩綸聞

命自

天威悚無地伏念安省居兩江之上游藩司繫百城  
之表率旬宣任重整飭事繁臣由京職敷歷外  
任僅閱兩年疊蒙

優擢知遇旣由於

特簡圖報倍矢於寸衷惟有益勵米兢實心實力以

冀稍酬

高厚鴻慈於萬一所有

微臣

感激下忱謹繕摺恭謝

天恩叩請

訓誨伏祈

皇上聖鑒謹

奏

道光元年十月初四日

恭報到安徽布政使任摺子

奏爲恭報

微臣

到任日期叩謝

天恩仰祈

聖鑒事竊

臣

自十月初間抵京欽奉

上諭授

臣

安徽藩司當經具摺謝

恩連日仰蒙四次

召見備荷

鴻慈獎勵

誨勉有加跪聆之下感悚難名旋經

陛辭就道於十一月初八日馳抵皖城准署藩司安

徽按察使惠顯將

敕印文卷移送到臣謹恭設香案望

闕叩頭祇領任事伏念臣以菲材首被

寵綸擢授臬司涓埃未報復蒙

簡畀藩司重任

恩施本由於特達

聖訓倍切於恒常臣雖愚鈍敢不敬謹服膺實心實

力矢公勤以率羣寮別賢否以端吏治除稂莠  
以安良善剔猾蠹以慎勾稽此則區區犬馬之  
忱所夙夜兢惕以冀稍酬

高厚於萬一者也至安徽錢糧虧空輾轉甲於各省  
從前五次清查仍多不實不盡疲玩因循遂成  
累癰卽稍知自愛者亦無以自拔吏治之靡多  
由於此業經前撫

臣李鴻賓

奏明設局清查一切事宜容

臣

次第經理恪遵

面諭輕重緩急相機妥辦一俟查明頭緒卽當隨同  
撫

臣

分別應參應補應籌務俾舊累一清而新

虧盡杜庶幾正本清源吏治可期整飭再

臣

自

出京後經過山東江南地境麥田均已播種齊  
全而安徽之宿州靈璧鳳陽等州縣凡被水之



區俱漸次涸退現據辦賑各員查驗被災戶口  
察看民情甚爲安帖堪以仰副

宸厪所有微臣感激下忱併到任日期謹繕摺恭謝

天恩伏祈

皇上聖鑒謹

奏

道光元年十一月十一日拜發十二月十九日

安徽藩署奉到

硃批知道了欽此